

**LJEKARSKA KOMORA  
ZENIČKO – DOBOJSKOG KANTONA**

**P R A V I L N I K  
O ODGOVORNOSTI ČLANOVA KOMORE**

Zenica, 2. oktobar 2014. godine

Na osnovu člana 25. Statuta Ljekarske komore Zeničko – dobojskog kantona, Skupština Ljekarske komore Zeničko – dobojskog kantona na svojoj redovnoj sjednici održanoj dana 2. 10.2014. godine usvojila je

## **P R A V I L N I K O ODGOVORNOSTI ČLANOVA KOMORE**

### **I OSNOVNE ODREDBE**

#### **Član 1.**

Ovim Pravilnikom uređuju se: povrede dužnosti i ugleda ljekarskog zvanja, mjere za učinjene povrede dužnosti i ugleda ljekarskog zvanja, pokretanje postupka za utvrđivanje povreda dužnosti i ugleda ljekarskog zvanja, organi i postupak za odlučivanje o povredama dužnosti i ugleda ljekarskog zvanja i druga pitanja od značaja za odgovornost članova Ljekarske komore Zeničko – dobojskog kantona (u daljem tekstu: Komora).

### **II POVREDE DUŽNOSTI I UGLEDA LJEKARSKOG ZVANJA**

#### **Član 2.**

Povredama dužnosti i ugleda ljekarskog zvanja smatra se:

- kršenje etičkih principa struke utvrđenih Kodeksom medicinske etike i deontologije,
- obavljanje dopunskog rada na način suprotan odredbama Zakona i Pravilnika,
- donošenje pravomoćne sudske odluke kojom je ljekaru izrečena mjera zabrane obavljanja ljekarske djelatnosti,
- donošenje pravomoćne sudske presude kojom je ljekar proglašen krivim za učinjenje krivičnih djela protiv zdravlja ljudi, podmićivanja i protiv službene i druge odgovornosti, utvrđenih krivičnim propisima Federacije.

### **III MJERE ZA UČINJENE POVREDA DUŽNOSTI I UGLEDA LJEKARSKOG ZVANJA**

#### **Član 3.**

Za utvrđene povrede dužnosti i ugleda ljekarskog zvanja članovima Komore mogu se izreći slijedeće mjere:

- opomena,
- javna opomena,
- privremeno oduzimanje odobrenja za samostalan rad - licence na period od tri (3), šest (6), devet (9) i dvanaest (12) mjeseci,
- trajno oduzimanje odobrenja za samostalan rad - licence,
- oglašavanje ljekara nedostojnim za obavljanje ljekarske djelatnosti.

#### **Član 4.**

Opomena i javna opomena izriču se:

- u slučajevima lakših kršenja etičkih principa struke utvrđenih Kodeksom medicinske etike i deontologije,

- kod obavljanja dopunskog rada na način suprotan odredbama Zakona i Pravilnika, ukoliko ljekar u datom roku otkloni uočene nedostatke na koje je upozoren od strane lica ovlaštenog za vršenje inspekcijskog nadzora.

#### **Član 5.**

Oduzimanje odobrenja za samostalan rad - licence članu Komore izriče se:

- u slučaju težeg kršenja etičkih principa struke utvrđenih Kodeksom medicinske etike i deontologije,
- kod obavljanja dopunskog rada na način suprotan odredbama Zakona i Pravilnika, ukoliko ljekar u datom roku ne otkloni uočene nedostatke na koje je upozoren od strane lica ovlaštenog za vršenje inspekcijskog nadzora,
- u slučaju kada je pravomoćnom sudskom odlukom ljekaru izrečena mjera zabrane obavljanja ljekarske djelatnosti.

#### **Član 6.**

Oglašavanje ljekara nedostojnim za obavljanje ljekarske djelatnosti izriče se ljekaru koji je pravomoćnom sudskom presudom proglašen krivim za počinjenje krivičnog djela protiv zdravlja ljudi, krivičnog djela podmićivanja i krivičnog djela protiv službene i druge odgovornosti, utvrđenih krivičnim propisima Federacije, i koji se, s obzirom na važnost i prirodu ugroženog dobra ili druge posljedice te s obzirom na okolnosti pod kojima je radnja izvršena, odnosno propuštena, odlukom Komore smatra nedostojnim za obavljanje ljekarske djelatnosti.

Ljekaru iz stava 1. ovog člana Komora može uskratiti izdavanje licence, odnosno može mu privremeno ili trajno oduzeti licencu.

#### **Član 7.**

Pri izricanju mjere zbog povrede dužnosti i ugleda ljekarskog zvanja članu Komore uzimaju se u obzir: važnost i priroda ugroženog dobra, težina povrede i njene posljedice, stepen odgovornosti člana Komore, uvjeti pod kojima je povreda učinjena, odnosno okolnosti pod kojima je radnja izvršena ili propuštena, raniji rad i ponašanje ljekara - člana Komore i druge okolnosti od uticaja za izricanje vrste mjere.

### **IV POKRETANJE POSTUPKA ZA UTVRĐIVANJE POVREDA DUŽNOSTI I UGLEDA LJEKARSKOG ZVANJA**

#### **Član 8.**

Tužitelj Komore je organ Komore koji čine Tužitelj i tri zamjenika Tužitelja.

Tužitelj Komore zahtjevom pokreće postupak za utvrđivanje povreda dužnosti i ugleda ljekarske struke.

Postupak iz stava 2. ovog člana pokreće se pred Sudom Komore.

Rad Tužitelja Komore odvija se u skladu sa odredbama ovog Pravilnika i Poslovnika o radu Tužitelja Komore.

Zahtjev za pokretanje postupka za utvrđivanje povrede dužnosti i ugleda ljekarskog zvanja mora biti u pismenoj formi i isti sadrži podatke bitne za utvrđivanje odgovornosti člana Komore.

Tužitelj i zamjenici Tužitelja Komore poslove iz svoje nadležnosti obavljaju kao pojedinci.

Zamjenici Tužitelja Komore rade po uputstvu Tužitelja Komore.

### **Član 9.**

Inicijativu za pokretanje postupka za utvrđivanje povrede dužnosti i ugleda ljekarskog zvanja Tužitelju Komore može dati:

- svaki član Komore,
- svi organi i Komisije Komore,
- sudski, inspekcijski i drugi državni organi.

### **Član 10.**

Tužitelj Komore dužan je pokrenuti postupak za utvrđivanje povrede dužnosti i ugleda ljekarskog zvanja u roku od petnaest (15) dana od dana kada je na bilo koji način saznao za povredu dužnosti i ugleda ljekarskog zvanja i za učinioca.

Zahtjev za pokretanje postupka dostavlja se istovremeno:

- članu Komore protiv koga se pokreće postupak,
- Sudu Komore.

## **V ORGANI KOMORE I POSTUPAK ZA ODLUČIVANJE O POVREDAMA DUŽNOSTI I UGLEDA LJEKARSKOG ZVANJA**

### **Član 11.**

Za vođenje postupka za utvrđivanje povreda dužnosti i ugleda ljekarskog zvanja ovlašteni su: Tužitelj Komore i Sud Komore.

### **Član 12.**

Sud Komore razmatra i donosi odluke o povredama dužnosti i ugleda ljekarske struke.

Sud Komore čine predsjednik, zamjenik predsjednika i deset (10) članova Suda.

Za razmatranje pojedinačnih postupaka, predsjednik Suda imenuje Vijeće od pet (5) članova, uključujući i predsjednika Suda.

Vijeće Suda radi u sjednicama kojima prisustvuju svi imenovani članovi Vijeća.

Rad Suda Komore odvija se u skladu sa odredbama ovog Pravilnika i Poslovnika o radu Suda Komore.

### **Član 13.**

Postupak Suda Komore pokreće se i vodi na osnovu zahtjeva za pokretanje postupka.

Sud Komore po provedenom postupku donosi odluku o odgovornosti člana Komore i izriče odgovarajuću mjeru.

Predsjednik Suda Komore upoznaje se sa zahtjevom za pokretanje postupka neposredno po njegovom prijemu i odlučuje da li je potrebno provesti prethodni postupak, odnosno prethodne uviđajne radnje i prikupljanje dokaza.

Predsjednik Suda Komore može sam provesti prethodni postupak.

### **Član 14.**

Predsjednik Suda Komore saziva sjednicu Vijeća, imenovanog za razmatranje pojedinačnog postupka povodom zahtjeva za pokretanje postupka, a poslije provedenog prethodnog postupka, odnosno odmah po prijemu zahtjeva za pokretanje postupka, ukoliko ocijeni da nije potrebno provoditi prethodni postupak.

#### **Član 15.**

Poziv za raspravu pred Vijećem Suda Komore članu Komore o kojem se raspravlja kao i drugim učesnicima mora biti dostavljen najkasnije pet (5) dana prije dana određenog za raspravu. Poziv mora sadržati podatke o predmetu rasprave, terminu održavanja sjednice Vijeća Suda Komore te podatak o svojstvu u kojem se neko poziva.

#### **Član 16.**

Rad Vijeća Suda Komore je javan.  
Vijeće Suda Komore može donijeti odluku o isključivanju javnosti.

#### **Član 17.**

Na sjednicu Vijeća Suda Komore, pored članova Vijeća, pozivaju se i Tužitelj Komore i član Komore protiv kojeg se vodi postupak.  
Na sjednicu Vijeća Suda Komore, u svrhu pružanja pomoći u utvrđivanju odgovornosti člana Komore, pozivaju se i svjedoci i/ili vještaci.

#### **Član 18.**

U postupku za utvrđivanje povreda dužnosti i ugleda ljekarskog zvanja, član Komore protiv koga je pokrenut postupak ima pravo uzeti branioca.  
Branilac iz stava 1.ovog člana može biti svako poslovno sposobno lice koje član Komore angažira.

#### **Član 19.**

Prije početka rasprave predsjednik Vijeća Suda Komore utvrđuje da li su prisutna sva pozvana lica. Ako na raspravu nije došao član Komore protiv koga je pokrenut postupak, koji je uredno pozvan, a izostanak nije opravdao, rasprava se može održati i bez njegovog prisustva.  
Ako na raspravu nisu došli pozvani članovi Vijeća Suda Komore, kao i član Komore protiv koga je pokrenut postupak, a ne postoji dokaz da im je poziv uručen, odnosno ako su opravdano spriječeni da dođu, rasprava se odlaže.  
Na raspravi Vijeća Suda Komore nije obavezno prisustvo Tužitelja Komore i ista se može održati i bez prisustva Tužitelja, ako predsjednik Vijeća odluči da se održi rasprava.  
Odluka o odlaganju rasprave odnosno o njenom održavanju bez prisustva člana Komore protiv koga je pokrenut postupak unosi se u zapisnik.  
Kad se rasprava odlaže određuje se dan i sat rasprave i to saopštava prisutnim licima ili se rasprava naknadno zakazuje.

#### **Član 20.**

Rasprava pred Vijećem Suda Komore počinje čitanjem zahtjeva za pokretanje postupka nakon čega se poziva član Komore, protiv koga je pokrenut postupak, da iznese svoju odbranu.  
Svjedoci daju svoju izjavu poslije člana Komore protiv koga je pokrenut postupak.  
Ako je potrebno može se izvršiti suočenje člana protiv koga je pokrenut postupak i svjedoka.  
Poslije svjedoka saslušat će se vještaci, ukoliko ih ima te se čitaju spisi, dokumenta i izjave svjedoka koji nisu prisutni sastanku Vijeća Suda Komore.

#### **Član 21.**

Predsjednik i članovi Vijeća Suda Komore, Tužitelj Komore, branilac člana Komore, član Komore protiv koga se vodi postupak i druga lica mogu u toku rasprave, po odobrenju

predsjednika Vijeća, postavljati pitanja članu Komore protiv koga se vodi postupak, svjedocima i vještacima i predlagati nove dokaze.

Predsjednik diktira u zapisnik odgovore na postavljena pitanja.

#### **Član 22.**

Na kraju se poziva član Komore protiv koga je pokrenut postupak da iznese završnu odbranu i Tužitelj Komore da iznese završnu riječ ako je isti prisutan.

Ako sastanku Vijeća Suda Komore prisustvuje branilac člana Komore isti ima pravo da učestvuje u toku čitavog postupka.

Rasprava pred Vijećem Suda Komore, ako je potrebno, može se prekinuti i nastaviti na slijedećoj sjednici.

#### **Član 23.**

Poslije završne odbrane člana Komore protiv koga se vodi postupak i završne riječi Tužitelja Komore predsjednik Vijeća proglašava da je rasprava zaključena.

#### **Član 24.**

Vijeće Suda Komore poslije zaključenja rasprave donosi odluku o odgovornosti člana Komore.

Vijeće Suda Komore može donijeti jednu od slijedećih odluka:

1. obustaviti postupak,
2. osloboditi člana Komore od odgovornosti,
3. izreći odgovarajuću mjeru.

#### **Član 25.**

Odluka iz prethodnog člana naročito sadrži:

1. uvod (naziv organa, sastav Vijeća, predmet rasprave, po čijem zahtjevu je postupak pokrenut, datum održavanja rasprave, datum donošenja odluke),
2. dispozitiv (odluka o odgovornosti člana Komore, izricanje mjere, odnosno odluka o oslobađanju člana Komore od odgovornosti ili odluka o obustavljanju postupka),
3. obrazloženje (činjenice koje su utvrđene, na osnovu kojih povreda se član Komore proglašava krivim, u čemu se sastoji povreda dužnosti i ugleda ljekarskog zvanja, olakšavajuće i otežavajuće okolnosti koje je Vijeće Suda Komore uzelo u obzir prilikom odlučivanja i druga potrebna obrazloženja),
4. pouku o pravnom lijeku.

#### **Član 26.**

Član Komore protiv koga se vodi postupak ima pravo tražiti izuzeće predsjednika ili pojedinog člana Vijeće Suda Komore s tim što je dužan navesti razloge.

O zahtjevu za izuzeće odlučuje Vijeće Suda Komore odmah po postavljanju zahtjeva.

#### **Član 27.**

Odluka Vijeća Suda Komore donosi se nadpolovičnom većinom (50% + 1) ukupnog broja imenovanih članova Vijeća.

#### **Član 28.**

Odluka o odgovornosti člana Komore protiv koga je vođen postupak saopštava se članu Komore neposredno poslije donošenja.

Ako se odluka o odgovornosti člana Komore ne može donijeti odmah, Vijeće Suda Komore može odložiti donošenje odluke najviše za pet (5) dana, a o zakazivanju novog sastanka obavještava člana Komore koji ima pravo da prisustvuje sastanku prilikom donošenja odluke.

#### **Član 29.**

Odluka o odgovornosti člana Komore dostavlja se članu Komore u pisanoj formi u roku od deset (10) dana od dana donošenja.

Odluka o odgovornosti člana Komore dostavlja se i Tužitelju Komore.

#### **Član 30.**

Protiv odluke Suda Komore u roku od petnaest (15) dana od dana dostavljanja odluke, putem Komore, može se izjaviti žalba Sudu Ljekarske/Liječničke komore FBiH.

Po prijemu žalbe Komora je dužna ispitati da li je žalba blagovremena, izjavljena od strane ovlaštenog lica i dopuštena te predmet sa svom dokumentacijom dostaviti Ljekarskoj/Liječničkoj komori FBiH – Sud Komore.

U slučajevima kada je žalba neblagovremena, nedopuštena ili izjavljena od strane neovlaštenog lica žalbu će rješenjem odbaciti.

#### **Član 31.**

Odluka Suda Ljekarske/Liječničke komore FBiH je konačna i protiv iste se može pokrenuti upravni spor pred nadležnim Sudom.

#### **Član 32.**

Izrečene mjere za povrede dužnosti i ugleda ljekarskog zvanja članu Komore moraju se izvršiti u roku od trideset (30) dana od dana konačnosti odluke.

Mjera - opomena izvršava se saopštavanjem iste članu Komore i Tužitelju Komore.

Mjera - javna opomena izvršava se isticanjem iste na oglasnoj tabli Komore i njenim objavljivanjem u glasilu Komore.

Mjera - privremeno i trajno oduzimanje odobrenja za samostalan rad – licence i oglašavanje ljekara nedostojnim za obavljanje ljekarske djelatnosti izvršava se dostavljanjem odluke i donošenjem konačnog rješenja o oduzimanju odobrenja za samostalan rad članu Komore i Tužitelju Komore.

#### **Član 33.**

O izrečenim mjerama zbog povrede dužnosti i ugleda ljekarskog zvanja člana Komore vodi se evidencija u Komori.

Mjera - opomena i javna opomena briše se iz evidencije istekom roka od dvije (2) godine, a mjera - oduzimanje odobrenja za samostalan rad briše se iz evidencije istekom roka od tri (3) godine od dana izvršenja.

Mjera - oglašavanje ljekara nedostojnim za obavljanje ljekarske djelatnosti briše se iz evidencije istekom roka od pet (5) godina od dana izvršenja.

## **VI PRELAZNE I ZAVRŠNE ODREDBE**

### **Član 34.**

Ovaj Pravilnik stupa na snagu osmog (8) dana od dana usvajanja na Skupštini Ljekarske komore Ze-do kantona.

Ovaj Pravilnik je objavljen na web stranici Ljekarske komore Ze-do kantona [www.ljkzedo.com.ba](http://www.ljkzedo.com.ba)

**predsjedavajuća Radnog predsjedništva  
Skupštine Ljekarske komore  
Ze-do kantona**

**Zenica, 2. 10. 2014. godine  
Broj: 01/S-2I-372 /14**

---

**Mersiha Mahmić-Kaknjo**